

[*en marge*] Parochialis sanctae Mariae Occhiatanae

Eadem die in vespere.

Praefatus dominus visitator (etc.) visitavit ecclesiam parochialem sub invocatione sanctae Mariae Occhiatana, cuius ad praesens est rector admodum reverendus dominus Matthaeus Saladinus, quam assequutus fuit septem circiter abhinc annis per concursum, ut ex bullis suae collationis [324r] Romae expeditis (etc.), percipiens in annuo reddito libras octocentum circiter monetae Genuae, consistentes in decimis, primitiis, oblationibus et in aliis proventibus bonorum stabilium dictae ecclesiae, quae est gravata pensione ducatorum triginta et quattuor ad favorem domini Ioannis Camilli abbatis Iustiniani.

Visitavit sanctissimum sacramentum, quod invenit asservari in pyxide ex auricalco cum cuppa argentea in totum deaurata, et est conopaeo rubei coloris instructa cum cruce in eius summitate ad formam atque inservit pro adoratione et communionibus generalibus. Visitavit aliam pyxidem parvam pariter ex argento intus deauratam cum cruce in eius summitate, quae inservit pro asportando sanctissimo viatico ad infirmos, et mandavit eam provideri de bursa serica cum suis cordulis sericis, unde appendatur ad collum sacerdotis.

Visitavit etiam ostensorium ex auricalco in totum deauratum cum suo vitro et cruce in summitate, quod inservit pro asportatione sanctissimi in processionibus, et est ad formam. Vidit baldachinum sericum rubei coloris, quod inservit pro deferendo sanctissimo ad formam; necnon vidit umbellam pro deferendo pariter viatico, et mandavit in melius readaptari et crucem in eius summitate apponi. Velum humerale adest non sericum, sed tolerabilis formae. Thurribulum cum eius navicula ex auricalco quoque adest cum duabus lanternis magnis cum cereis pro deferendo sanctissimo, de quibus providetur a communitate, quae etiam providet et de oleo pro lampade semper ardenti coram ipso sanctissimo sacramento, quod asservatur ad altare maius in tabernaculo ligneo in totum deaurato, conopaeis diversi coloris secundum tempora instructo, sera secreta et clave munito ad formam, et supra ipsum pendet etiam baldachinum ad formam.

Visitavit fontem baptismalem, cuius vas est marmoreum, ciborium vero ligneum, conopaeo cerulei coloris instructum cum cruce in eius summitate, munitum etiam sera secreta et clave quae detinetur penes [324v] parochum, et est satis ad formam, mandavit tamen supra ipsum umbellam seu baldachinum appendi in eodem fonte. Vidit colcar (?) ex argento pro aqua suscipienda et etiam vasa stamnea oleorum chrysmatis et cathecumenorum, et sunt ad formam.

Visitavit etiam oleum infirmorum in vase argenteo cum eius bursa ad formam, et invenit asservari in quadam fenestrula a tergo altaris munita ser<r>a secreta et clave quae detinetur paenes parochum, et quia invenit ad formam ibi toleravit.

Prope etiam altare maius in cornu epistolae invenit ad formam sacrarium ostiolo munito [*sic*] cum ser<r>a secreta et clave quae detinetur paenes parochum, et sic laudavit.

Doctrina christiana docetur per dominum parochum singulis diebus dominicis ad horam nonae circiter, et populus reperitur satis instructus.

Nuptiae non benedicuntur, ideo mandavit in posterum benedici ad formam missalis romani, et si sponsi negligentis fuerint contra eos poenam statuendam (etc.).

Procuratores huius ecclesiae singulis annis renovantur computa tunc temporis reddentes coram parcho et novis procuratoribus.

Visitavit altare maius, quod manutenetur a communitate, nullum habens redditum nec onus, et est satis provisum de necessariis ad celebrationem missae. Dictum altare providetur de candelis pro missis celebrandis a consortio mulierum ibi erecto auctoritate ordinarii, et gubernatur a domino rectore sub quibusdam regulis ab eodem ordinario approbatis. Habent etiam ipsae mulieres suas officiales, cuius caput dicitur priora, et singulis annis renovantur, et computa tunc temporis redduntur coram parcho et novis officialibus. Habent etiam massam pecuniariam [**325r**] ex contributionibus certis annuis constitutam, de qua solent providere prius altare et postea sorores defunctas, tribuentes libras decem cerae pro sepulchralibus exequiis in earum depositione. Solent etiam congregari semel in mense in ecclesia parochiali, ubi per parochum legitur eis regula, et etiam aliae preces una simul effundunt.

Visitavit altare sub invocatione Corporis Christi pariter manutentum a communitate, et ibi est erecta societas Corporis Christi tam de viris quam de mulieribus auctoritate apostolica cum suis privilegiis et indulgentiis. Dictum altare est provisum de icone cum ornamento ad formam et etiam de reliquis necessariis ad celebrationem missae quae in ea solet aliquando celebrari absque ullo reddito et onere.

Visitavit altare sub invocatione divi Antonii, quod manutenetur a communitate, et est eleganter provisum de necessariis ad celebrationem missae, nullum habens redditum nec onus; supradictum [*sic*] altare intra cancellos vitreos adest imago sculpta eiusdem divi Antonii cum ornamento columnarum circum circa.

Visitavit altare sub titulo Purgatorii pariter manutentum a communitate, cum onere celebrandi semel in mense per parochum usque in perpetuum, ut ex legato olim domini Aloysii de eodem loco Occhiatanae, qui domum parochi legavit. Dictum altare est provisum sufficienter ad celebrationem missae.

Visitavit sedem confessionalem et mandavit eius crates ligneas in ferreas converti et etiam in ea apponi summarium bullae [325v] Coenae una cum schedula casuum reservatorum.

Vidit etiam pulpitum ex lapide et calce confectum, et est ad formam, sed quia in aliqua parte vidit frantum [sic], ideo mandavit readaptari. In dicto pulpito solet concio haberi ad populum, et readaptetur dictum pulpitum infra sex menses.

Visitavit suppellectilia sacra, quae invenitur asservari in choro in quodam scamno et capsamunitis ambobus ser< >is secretis et clavibus quae detinentur paenes parochum, sed mandavit supra idem scamnum fieri quasdam scancias, ubi commodius asserventur calices, et muniantur ser<r>is secretis et clavibus quae detineri debeant paenes parochum. Dicta suppellectilia sacra invenit sufficientia, sed mandavit casulam albi coloris cum sua stola laceram et frantam [sic] readaptari, et haec omnia infra sex menses.

Corpus ecclesiae est dealbatum et ad formam et in eo nulla reperiuntur sepulchralia monumenta, et dictum fuit cadavera defunctorum huius parochiae asportari sepelienda ad ecclesiam fratrum divi Francisci de Tuvani, quae reperitur intra limites huius parochiae, ubi solent demorari decem et octo religiosi. Super dictis monumentis nihil ordinavit, quia invenit populum renuentem, et ideo deferendum duxit illustrissimo et reverendissimo domino (etc.).

Vidit campanile cum duabus campanis ad formam.

Fores eiusdem ecclesiae sunt ad formam, munitae ser<r>a secreta et clave quae detinetur paenes parochum. Prope dictam ecclesiam parochialem visitavit aedes canonicales, quas invenit suffic[i]entes, et ibi inhabitat parochus.

[*en marge*] Oratorium

Visitavit oratorium situm in proprio loco Occhietanae [sic], parum distans ab ecclesia [326r] parochiali praedicta, quod manutentur a confraternitate laicali quae est ibi erecta auctoritate ordinarii, serviens sub quibusdam capitulis ab eodem approbatis. Confratres induunt cappas albas et habent suos officiales, cuius caput vocatur prior, et renovantur ter per annum, excepto massario qui durat ad sex menses, et tunc temporis computa redduntur coram parochi et novis officialibus. Habent quasdam contributiones annuas certas, ex quibus constituunt massam

pecuniariam et ex ea solent providere altare et confratres defunctos de decem et septem libris cerae in eorum depositione pro sepulchralibus exequiis, solent etiam elemosinas praestare pro missis celebrandis. Singulis [diebus] festivis congregantur et ibi solent recitare officium beatae virginis Mariae et alias preces effundere, sicut etiam solent associare defunctos fratres sepeliendos processionaliter cum suis cappis.

Visitavit altare sub invocatione sanctissimae virginis Annunziatae pariter manutentum ab eadem confraternitate, nullum habens redditum nec onus nec ulla gaudet indulgentia. Est venuste provisum de icone et de requisitis ad celebrationem missae quae aliquando solet celebrari. Corpus oratorii est dealbatum et ad formam et scamnis ligneis circum circa septum. Fores eiusdem sunt munitae clave quae detinetur paenes priorem. Supra murum dicti oratorii vidit parvulum campanile cum campana ad formam.

Vidit libros parochiales et mandavit servari formam ritualis romani. Animae huius parochiae sunt in totum sexcentum circiter, ex quibus communicantur quatuorcentum circiter, et omnes paruerunt praecepto ecclesiae, exceptis nonnullis impeditis qui se iam praesentaverunt parocho, et ut certo certius in posterum [326v] sciatur an omnes communicaverint mandavit distribui schedulas et eas recolligi priusquam terminetur tempus paschale.

[*en marge*] Ecclesiam [*sic*] campestem [*sic*]

Visitavit ecclesiam campestem sub invocatione sancti Bartholomaei de Occhiatana, quae antiquitus erat parochialis, sed modo translata fuit ad ecclesiam praedictam sanctae Mariae sitam in proprio loco Occhiatanae. Dicta ecclesia est expoliata et nuda et habet unicum altare pariter expoliatum et nudum, solent tamen in eo celebrari semel in anno in die festivo eiusdem, et tunc temporis dictum fuit asportari suppellectilia sacra ex ecclesia parochiali. Corpus ecclesiae est ad formam et etiam eius fores sunt [ad formam], munitae clave quae detinetur paenes parochum.